

10-D15-Sy

مرحبا. كيفكن؟ أنا اسمي غسان مهنا. أنا بالأصل من اللاذقية. بس إجيت ع الشام مشان ادرس بجامعة دمشق. وتخرجت من كلية التجارة قسم إدارة الأعمال. وبعد ما تخرجت اشتغلت بعدة وظائف. بس ما كنت مبسوط بالشغل لأنو الشغل كان كتير مُمِلّ. كلّ يوم نفس الشي. بجي ع المكتب الساعة ثمانية ونصّ الصُبح. بالحقيقة، أيام كتير كنت تأخّر للساعة تسعة. بقعد بالمطعم لنتين بعد الظهر. بشتغل شوي، بقرى جرايد، بحكي مع رفقاتي الموظفين بالمكتب. وبعدين برجع ع البيت. وكمان المعاش كان كتير قليل. بدي اتجوّز وأعمل عايلة. بس ما معي مصاري كتير، وما ممكن أعيش من الوظيفة بس.

فمشان هيك، عملت بزيز صغير ع الإنترنت. أنا بعمل صفحات ع الإنترنت لبعض المحلات والشركات الصغيرة. يعني كل شغلي ع الكمبيوتر.

كل يوم، بعد الشغل برجع ع البيت، بتغدى، بنام شوي، وبعدين بروح بقعد بقهوة فيها إنترنت. وبسهر لحدّ الساعة وحدة، وحدة ونص بالليل. وبشرب أرجيلة. على فكرة، أنا بحب الأرجيلة كتير.

الحمد لله. الشغل ماشي كتير منيح. وإنشالله بالمستقبل بيكبر أكثر وأكثر. يعني هلاّ صار معي شوية مصاري، وصار ممكن اشوف بنت حلال اجوزها. قولو إنشالله.

طيب. أنت تأخرت. وصار لازم اروح بِسُرْعَة. لأنو عندي موعد.
باي.